



We will be conducting system maintenance from 21 Feb, 10pm to 22 Feb, 9am. Patrons will not be able to use NLB's digital services during this period.

Tiga juara nasional dijangka kekal mahkota

Berita Harian, 2 September 1995, Page 20

Article also available on Microfilm Reel NL20474

Printer-Friendly Page

Tiga juara nasional dijangka kekal mahkota

KEJOHANAN PENCAK SILAT NASIONAL

Oleh | **SAPARIN RASIKIN**

DUA pemenang pingat emas Sukan SEA; Sheik Alauddin Yaacob dan Mohamad Hidayat Hosni, dijangka mengekalkan mahkota masing-masing dalam pertandingan akhir Kejuhanan Pencak Silat Nasional di Dewan Sukan Bedok, petang esok.

Begitu juga dengan 'srikandi' Badriah Hosni, yang akan menentang Masriah A. Rani dalam pertandingan akhir wanita Kelas A.

Pertandingan akhir Bahagian Remaja silat olahraga, yang melibatkan lima pertarungan lelaki dan tiga wanita pula, akan berlangsung di gelanggang yang sama mulai 2 petang ini.

Setiausaha Agung Persekutuan Silat Singapura (Persisi), Sarkawai Haji Masom, berkata: "Dalam bahagian dewasa, tujuh pertarungan lelaki dan satu wanita diadakan.

"Kemuncak pertarungan adalah antara juara bertahan Kelas Bebas, Sheik Alauddin, dengan Jaren Juwahir."

Bagaimanapun, pendekar dari Sendeng Belalang ini, yang merupakan pemenang pingat emas tunggal Singapura dalam Kejuhanan Dunia di Haadyai, Thailand Disember lalu, kelihatan terlalu gagah bagi pencabarnya dari Gayong Pasak.

Hidayat, yang mewakili

Alhaq, dan seorang lagi peserta republik ini ke Kejohanan Dunia, dijangka tidak menghadapi masalah untuk melenturkan kegigihan peserta dari Sendeng Pukolan, Norisham Adam.

Badriah, yang tewas di tangan peserta Brunei 2-3 dalam pertandingan Kejohanan Dunia, merupakan seorang lagi pesilat yang dijangka mengekalkan gelarnya.

Menurut Sarkawai, selain silat olahraga, pertandingan akhir silat kesenian juga akan turut diadakan pada kedua-dua hari itu.

Mengulas tentang persiapan bagi Sukan SEA Chiangmai, Setiausaha Agung Persisi itu berkata: "Kecuali kedudukan Sheik, Hidayat dan Badriah, pemilihan terakhir akan dibuat selepas Kejohanan Nasional ini nanti.


"Sheik dan Hidayat menjamin tempat masing-masing. Kedua-duanya adalah juara bertahan dalam Sukan SEA, di samping prestasi mereka yang cemerlang dalam Kejohanan Dunia.

"Persisi akan mencalonkan para pesilat dalam kesemua 15 acara yang dipertandingkan, termasuk lima dalam bahagian wanita.

"Matlamat kami ialah memenangi sekurang-kurangnya empat pingat emas di Chiangmai. Dengan latihan keras, Persisi yakin matlamat ini dalam jangkauan kami."



SHEIK ALAUDDIN:
Terlalu gagah buat pencabarnya.



MOHAMAD HIDAYAT:
Tiada masalah lenturkan lawannya.